



Broj:02-04-476/22

Datum, 04.04.2022.godine

ZAPISNIK sa 15. redovne sjednice 7. saziva Općinskog vijeća Doboj Istok

Petnaesta redovna sjednica 7. saziva Općinskog vijeća održana je dana 31.03.2022. godine u zgradi općine Doboj Istok u Klokočnici sa početkom u 10,00 sati.

PRISUTNI: 17 vijećnika, Kemal Bratić, općinski načelnik, Omer Hadžić, sekretar općine, Abdulah Hrnjičić, ovlašteno lice da zamjenjuje pomoćnika općinskog načelnika za prostorno uređenje, Samir Mujkić, ovlašteno lice da zamjenjuje pomoćnika općinskog načelnika za poduzetništvo i financije, Damir Avdaković, šef odsjeka za upravljanje razvojem, Rasim Sofić, tehnički direktor JKP „Čisto“ d.o.o. Doboj Istok, Fehim Alihodžić, predsjednik Savjeta MZ Lukavica Rijeka, Amir Bradarić, predsjednik Savjeta MZ Klokočnica, Ermin Mujkanović, predsjednik Savjeta MZ Brijesnica Velika i komandir Dobrovoljne vatrogasne jedinice Doboj Istok, Agan Delić, predsjednik Savjeta MZ Stanić Rijeka, Rifet Mrkanović, predsjednik Udruženja penzionera Doboj Istok, Izet Škrebo, predsjednik Organizacije ratnih vojnih invalida Doboj Istok, Hava Mešić, predsjednica Organizacije porodica šehida i poginulih boraca Doboj Istok, Husein Šuvalić, predsjednik Općinske organizacije Crvenog križa Doboj Istok i sekretar Organizacije demobilisanih boraca općine Doboj Istok i Nevzeta Omerhodžić, predsjednica Udruženja žena Doboj Istok.

Sjednicu je otvorio i vodio predsjedavajući Općinskog vijeća, Selmin Karić.

Selmin Karić, predsjedavajući Općinskog vijeća: „Uvaženi načelnice sa saradnicima, kolege i kolegice, vijećnici esalamu alejkum i dobar dan. Otvaram 15. redovnu sjednicu 7. saziva Općinskog vijeća Doboj Istok. Molim tehničkog sekretara da utvrdi broj prisutnih na današnjoj sjednici. Znači, prisutno je svih 17 vijećnika.“

USVAJANJE ZAPISNIKA SA PRETHODNE SJEDNICE OPĆINSKOG VIJEĆA

Selmin Karić, predsjedavajući Općinskog vijeća: „ Dobili ste zapisnik sa prethodne sjednice Općinskog vijeća Doboj Istok. Ima li neko primjedbu? Nema. Ko je za usvajanje zapisnika?

Glasanje: ZA – 17, PROTIV – 0, UZDRŽANIH – 0.

VIJEĆNIČKA PITANJA

Selmin Karić, predsjedavajući Općinskog vijeća: „ Ima li neko pripremljeno vijećničko pitanje? Nema.“

USVAJANJE DNEVNOG REDA

Selmin Karić, predsjedavajući Općinskog vijeća: „ Za današnju sjednicu predlažem sljedeći dnevni red:

1. Razmatranje i usvajanje prijedloga Odluke o usvajanju Plana upravljanja otpadom općine Doboj Istok za period 2022-2027. godina,
2. Razmatranje i usvajanje prijedloga Odluke o učešću u sufinansiranju Projekta izgradnje montažnih objekata za socijalne kategorije
3. Razmatranje i usvajanje prijedloga Odluke o utvrđivanju javnog interesa za izgradnju spomen obilježja sa spomen sobom u Stanić Rijeci,
4. Razmatranje i usvajanje prijedloga Odluke o objavljivanju ponovnog javnog oglasa za imenovanje člana Općinske izborne komisije Doboj Istok,
5. Razmatranje i usvajanje prijedloga Ponovnog javnog oglasa za imenovanje člana Općinske izborne komisije Doboj Istok,

6. Razmatranje i usvajanje Izvještaja o sprovedenom redovnom godišnjem anketiranju o zadovoljstvu građana,
7. Razmatranje i usvajanje Izvještaja o radu Općinskog načelnika za 2021. godinu
8. Razmatranje i usvajanje Izvještaja o radu Savjeta Mjesne zajednice Klokočnica za 2021. godinu
9. Razmatranje i usvajanje Izvještaja o radu Savjeta Mjesne zajednice Brijesnica Velika za 2021. godinu
10. Razmatranje i usvajanje Izvještaja o radu Savjeta Mjesne zajednice Brijesnica Mala za 2021. godinu
11. Razmatranje i usvajanje Izvještaja o radu Savjeta Mjesne zajednice Stanić Rijeka za 2021. godinu
12. Razmatranje i usvajanje Izvještaja o radu Savjeta Mjesne zajednice Lukavica Rijeka za 2021. godinu
13. Razmatranje i usvajanje Izvještaja udruženja građana o utrošku dodijeljenih budžetskih sredstava za 2021. godinu sa završnim računom
14. Razmatranje i usvajanje Informacije o provedenim aktivnostima povodom obilježavanja Dana nezavisnosti BiH i Dana općine Doboj Istok.
Ko je za usvajanje dnevnog reda?
Glasanje: ZA – 17, PROTIV – 0, UZDRŽANIH – 0.

REALIZACIJA DNEVNOG REDA

1. Razmatranje i usvajanje prijedloga Odluke o usvajanju Plana upravljanja otpadom općine Doboj Istok za period 2022-2027. godina,

Selmin Karić, predsjedavajući Općinskog vijeća: „Tačku dajem na diskusiju.“

Emira Karić, predsjednica kluba vijećnika SDP: „Sve vas srdačno pozdravljam da ne nabrajam odvojeno i nadam se da ćemo se danas ugodno osjećati. Što se tiče ove prve tačke dnevnog reda moram biti iskrena do kasno u noć sam je pretraživala, jer sam prije sedam dana letimično, a sinoć sam morala taj materijal od 72 stranice da isčitam u cjelini kako bih imala taj sklop u svojim mislima. Ono što mogu reći ozbiljan dokument i ko god je zaslužan svaka čast. Isto tako mogu reći ko bude istraživao općinu Doboj Istok ovo je zaista jedan jako dobar izvor koji može poslužiti vezano za razne informacije iz geografskog položaja i stanovništva. Znači svaka čast, jer to tema nije bila i da li je to uputa da se tako radi, a ako nije svaka čast na tom obimnom materijalu, dobar je a mogu poslužiti i u školama, sve te informacije koje su ne znam da li slučajno ili namjerno sakupljene na jednom mjestu. Dolazimo do teme, a to je Plan upravljanja otpadom i tu je sve, zaista sve regulisano i sve ste informacije predočili od kanti za smeće, prijevoza, plana itd. Takođe veoma kvalitetne informacije i nije uopšte sporno ovu tačku usvojiti. Možda kod edukacije građana, jer mislim da je nedovoljna i da se mora još naći načina na koji doprijeti do građana odnosno educirati na prave načine. Moram isto skrenuti pažnju kada se spominje da se morate pozvati na federalni zakon i na kantonalni, a isto tako i na Odluku o komunalnom redu. Smatram da bi implementacija ove odluke trebala biti bolja, a nećemo se ovdje prozivati, ali zaista znam da određeni građani upućuju neke kritike, da tako kažem, neka nezadovoljstva, a na kraju krajeva neki i prijavljuju, a da se ta implementacija zaista vremenski jako teško i sporo dešava. Znači samo zamjerka je na bolju edukaciju i na implementaciju Odluke o komunalnom redu.“

Kemal Skopljak, vijećnik BPS: „Prije svega da pozdravim i poselamim sve prisutne. Nisam mogao da ne izađem i kažem par riječi pošto smo imali komisiju prije par dana, a vidjeli ste zaključke te komisije. Znači što se tiče samog dokumenta, dokument je fantastičan, urađen je tako da čak i mi laici koji se ne razumijemo u neke stvari možemo vidjeti šta i kako treba raditi u općini Doboj Istok. Naročito bih pohvalio onaj prijedlog vezan za reciklažu otpada, a vidjeli ste u prijedlogu šta je sve navedeno, šta treba uraditi i kako treba uraditi. Ovo je fantastično. Dalje, prezentacija odvoza smeća, kupljenje smeća je isto tako fantastična, jer se tačno zna koliko koji kamion troši goriva, kako se to isplati, da li je isplativo ili nije. Još jednu stvar bih htio ovdje da naglasim da mi moramo obratiti pažnju, jer procenat ugovora o odvozu smeća je katastrofalan i na tome treba poraditi pod hitno. Znači najmanje plaćamo za odvoz smeća, a procenat ugovora je najmanji i govorili smo nešto da se treba uključiti što se tiče opomena i što se tiče kažnjavanja, a razumijete o čemu govorim, jer to je nedopustivo.“

Selmin Karić, predsjedavajući Općinskog vijeća: „Zahvaljujem se kolegi Kemalu. Ima li još prijavljenih? Nema. Zaključujem diskusiju i dajem na glasanje. Ko je za usvajanje prijedloga Odluke o usvajanju Plana upravljanja otpadom općine Doboj Istok za period 2022-2027. godina?“

Glasanje: ZA – 17, PROTIV – 0, UZDRŽANIH – 0.

2. Razmatranje i usvajanje prijedloga Odluke o učešću u sufinansiranju Projekta izgradnje montažnih objekata za socijalne kategorije

Selmin Karić, predsjedavajući Općinskog vijeća: „Tačku dajem na diskusiju. Ima li prijavljenih? Nema. Ko je za usvajanje?“

Glasanje: ZA – 17, PROTIV – 0, UZDRŽANIH – 0.

3. Razmatranje i usvajanje prijedloga Odluke o utvrđivanju javnog interesa za izgradnju spomen obilježja sa spomen sobom u Stanić Rijeci,

Selmin Karić, predsjedavajući Općinskog vijeća: „ Tačku dajem na diskusiju. Ima li prijavljenih? Nema. Ko je za usvajanje?“

Glasanje: ZA – 17, PROTIV – 0, UZDRŽANIH – 0.

4. Razmatranje i usvajanje prijedloga Odluke o objavljivanju ponovnog javnog oglasa za imenovanje člana Općinske izborne komisije Doboj Istok,

Selmin Karić, predsjedavajući Općinskog vijeća: „ Tačku dajem na diskusiju.“

Emira Karić, predsjednica kluba vijećnika SDP: „ Ova tačka je došla na dnevni red sjednice iz razloga što su urađeni određeni propusti u tumačenju. Koliko sam mogla da razumijem pravnik osoba koja se nalazi na listi da li za lokalne ili državne izbore ne može se narednih pet godina kandidovati u Općinsku izbornu komisiju. Neki vijećnici nisu upućeni u to zato što ne prisustvuju Kolegiju i zato donosimo danas ovu Odluku i naravno da ćemo je podržati.“

Selmin Karić, predsjedavajući Općinskog vijeća: „ Zahvaljujem se. Ima li još prijavljenih? Nema. Zaključujem raspravu. Ko je za usvajanje prijedloga Odluke o objavljivanju ponovnog javnog oglasa za imenovanje člana Općinske izborne komisije Doboj Istok?“

Glasanje: ZA – 17, PROTIV – 0, UZDRŽANIH – 0.

5. Razmatranje i usvajanje prijedloga Ponovnog javnog oglasa za imenovanje člana Općinske izborne komisije Doboj Istok,

Selmin Karić, predsjedavajući Općinskog vijeća: „ Tačku dajem na diskusiju. Ima li prijavljenih? Nema. Ko je za?“

Glasanje: ZA – 17, PROTIV – 0, UZDRŽANIH – 0.

6. Razmatranje i usvajanje Izvještaja o sprovedenom redovnom godišnjem anketiranju o zadovoljstvu građana

Selmin Karić, predsjedavajući Općinskog vijeća: „ Tačku dajem na diskusiju.“

Emira Karić, predsjednica kluba vijećnika SDP: „Evo ponovo jedan kvalitetno urađen dokument koji smo dobili na email adrese. Također sam ga isčitala i kažem kvalitetno urađeni tabelarni prikazi, zaista realistično. Možda nemamo informaciju na koji način su građani anketirani, da li je to u prostorijama određenim, da li je to bila skupina, da li je to bilo na ulici i tu cijelu informaciju nemamo. Smatram da bi bilo bolje ako bi u budućnosti, a morat ćemo ovo raditi, da se jednostavno nađu određeni termini kada će građani, da li po određenim pozivima dolaziti. Mislim da bi realističnija slika bila, jer ako ga uhvatiš u hodu, a vjerovatno je bilo i toga, on misli da će se prepoznati iako je anketiranje anonimno i da li dobivamo pravu sliku. Najbolje je dobiti pravu sliku, jer mene je začudilo anketiranje kada su u pitanju sportska i kulturna dešavanja i tu je bilo zadovoljstvo, po meni, jako dobro. Ja smatram da smo mi općina koja nema dovoljno ni kulturnih ni sportskih dešavanja. Evo naši građani su se izjasnili da su zadovoljni, pa ću i ja prihvatiti i onda neću ni raditi baš previše na tom kulturnom i sportskom. Kažem dobro je dobiti pravilne podatke, ali povjerovat ćemo da je sve bilo kako treba.“

Hasan Hasančević, predsjednik kluba vijećnika SDA: „Pošto prvi puta izlazim sve ću poselamiti i pozdraviti. Nije replika. Materijal je dobro urađen, ali ako nema sportskih dešavanja, kulturnih bi se mogao i složiti da je manje, pa kakvih ima na 10,5 hiljada stanovnika nego kod nas. Smatram da su sva školska djeca obuhvaćena sportskim dešavanjima i učešćima u sportskim kolektivima u Doboj Istoku što je jedan od razloga da postoje. Drugo imamo prvaka na raznim nivoima i u raznim sportovima ako i to ne vidimo, ne znam. Ima ljudi reći ću otvoreno za govornicom, svejedno je njemu, ako ga je neko anketirao, hoće li biti sporta ili neće i to treba da prihvatimo kao realnost. Svejedno mu je hoće li biti kakva priredba, ima svoj neki život, svoje tokove i tako ide. Znači ovo su relevantni podaci, uzimani kako su uzimani, po zadacima organizacije sa kojima je dogovoreno i to je to, a ima neko ko će to objasniti.“

Emira Karić, predsjednica kluba vijećnika SDP: „Kako sam razumjela u anketi je bilo pitanje sportska dešavanja, a ne uključenost djece u sport. Uključenošću djece u sport i ja sam zadovoljna, jer imamo Rukometni klub Index, imamo i Karate klub, Spin itd. Međutim ozbiljnijih kulturnih i sportskih dešavanja mislim da manjka na području općine Doboj Istok. Isto tako koliko god se neko potruži, moram biti iskrena, nemamo ni kulturu dolaženja niti na sportska niti na kulturna dešavanja. Koliko je nekom stalo da tu kulturu uzdiže ili ne, to je isto tako individualna stvar. Evo ja ću se opet zalagati za neke utakmice da li premijer lige da li međunarodne u nekim određenim sportovima. Naravno trebali bi i ostali ko god je u mogućnosti možda i neku predstavu dovesti itd. jer mi nemamo ni kino sale, nemamo ni adekvatnog kulturnog centra, da se razumijemo. Znači na svim tim stvarima trebalo bi poraditi i samim tim bi se i ta kultura dolaženja na određena i sportska i kulturna dešavanja povećavala.“

Kemal Bratić, općinski načelnik: „I ja vas sve srdačno selamim. Ono što ću reći možda će se razlikovati od diskusija vijećnika. Mi ovu anketu, počev od mene pa dalje vijećnika i mojih saradnika, trebamo iskoristiti kao nešto što će nam biti pokazatelj u kojem pravcu trebamo ići i ono što trebamo popravljati u narednom periodu. Ja sam doživio ova prethodna dva vijećnika kao da su oni anketirani, pa iznose svoje mišljenje, a ne trebamo ići u tom pravcu. Ja sam razumio da građani nisu zadovoljni baš sa sportskim dešavanjima, međutim nije to samo do nas. Ovdje ima prisutnih koji su vodili i koji vode neka udruženja i koji imaju za cilj da organizuju kako sportska tako i ova kulturna dešavanja. Najviše bih se složio sa konstatacijom vijećnice Emire da mi nemamo te kulture posjećivanja bilo kakvih događaja na području naše općine, da li su nešto organizovali penzioneri ili teniseri. Mi smo imali državna prvenstva ovdje u određenim kategorijama, pa imamo raznorazne turnire i da li je to dovoljno, vjerovatno nije. Ne trebamo ni praviti te manifestacije da bi nekoga natjerali, niti možemo natjerati nekoga da dođe, da posjeti i da podrži tu manifestaciju. Dosta nas je ovdje koji smo prisutni, pa ne dolazimo, pa evo i ja nekada ne odem na neku manifestaciju, jer možda imam neke druge obaveze ili nešto drugo u planu. Po meni anketa je urađena po standardima i po principima koje nam je dao UNDP i nije frizirana. Mogla je biti frizirana, ali nije frizirana. Anketa se vršila po slučajnom uzorku tačno procentualno muški, ženski, socijalne kategorije i sve ono što je propisano u tom pravilniku UNDP. Meni je drago da smo uradili jednu takvu anketu, jer će to biti pokazatelj u kojem pravcu da idemo od proširenja javnih zelenih površina gdje su građani nezadovoljni, pa i nekih drugih stvari. Znači mi sve to zajedničkim snagama možemo unaprijediti, a naravno nešto i nije u našoj moći, ali svi mi trebamo da damo doprinos da bi popravili ove stavke gdje smo vidjeli da su građani tamo na neki način manje zadovoljni ili nezadovoljni našim radom i dešavanjima na području općine Doboj Istok. Ovo je prva anketa i svi znamo kako se ponašamo kada radimo i kada učestvujemo u nekoj anketi i otprilike 50% nas to uradi da bi otišli, odnosno da bi završili i možda u nekim pokazateljima nešto i nije tačno, ali anketa je to pokazala, ona je urađena i završena i to nama pokazuje. Da li je to 100% tačno ja se ne bih složio u nekim stavkama, ali anketa je takva kakva jeste. Naš zadatak je i ja evo pozivam ovdje sve prisutne, pošto ima i predsjednika mjesnih zajednica, vas vijećnike i svoje saradnike da svi dubiozno još jednom prostudiramo tu anketu i da vidimo šta je u našoj moći da u narednom periodu, a mislim da možemo ovo što su moji prethodnici govorili o formiranju kulturnog centra i da otvorimo prostor za dešavanja na području naše općine kako bi naši građani bili što zadovoljniji u narednom periodu. Osjećao sam potrebu da to kažem, a nisam imao namjeru da bilo koga prozivam.“

Emira Karić, predsjednica kluba vijećnika SDP: „Samo da kažem da je 64% sportska dešavanja i to je po meni zadovoljstvo jer se približava sredini, ali je dobro. Smatram evo i nadovezat ću se i za kulturni još imam u glavi određeno vrijeme ideju da bi trebali imati jedan klub koji sport u pitanju treba odrediti prema čemu spremimo i da taj klub podržavamo da se takmiči na nekoj većoj razini i da mi imamo, da tako kažem, taj neki lokalni način navijanja. Svaka čast dosadašnjim klubovima, ali smatram da je Doboj Istok nakon osnivanja naše općine zaslužio da vidimo i da se to radi u sklopu tjelesnog odgoja. Ako kažemo da je to

rukomet, da je to košarka ili fudbal nebitno, da zajedno sa školama i nastavnicima tjelesnog odgoja razvijamo učenike u tom smislu i da nemamo problema da li imamo fudbalera, igrača rukometa, košarkaša itd. Znači to je jedna sveobuhvatna organizacija i zaista trebamo sjesti i onako drugarski i prijateljski napraviti neku koncepciju da možda za pet godina zaista imamo klub da li federalna, da li premijer liga i da uđe u nas jednostavno taj način sportskog navijanja i podržavanja takvih manifestacija. Načelnik je takođe govorio vezano za zelene površine i ja vas moram podsjetiti ne samo da je odbijena inicijativa za uređenje zemljanog dijela trotoara od strane srednje i osnovnih škola gde smo mi htjeli sufinansirati i naći načina da mi uredimo te zemljane dijelova trotoara. Osim što je bila odbijena ja sam primijetila da je od nekih vijećnika bila ismijana, pa tako pridružujem se ovoj anketi i ovom nezadovoljstvu. To su male stvari, znači kreće se od malih stvari i podržavanju malih stvari, pa i tog zemljanog dijela. Da li će djeca biti ugrožena neko je ovdje govorio, mi smo svi pedagozi i znamo mi mjere i predostrožnosti kad se djeca uključuju, a na kraju krajeva i razvijanje volonterizma itd.“

Kemal Bratić, općinski načelnik: „ Ja bih ispravio, ja pozivam da jaranski sjednemo, ne drugarski i da dogovorimo za neki klub. Da je i danas inicijativa da naša djeca uređuju zelene površine na magistrali, ja iako nisam vijećnik, bih bio protiv. Znam zašto to govorim, jer ne daj Bože nekog slučaja prvo bi bilo odgovorno lice škole koje je angažovalo, a vjerovatno bi bilo potegnuto i vijeće koje je usvojilo tu inicijativu. U potpunosti se slažem da jaranski naši predstavnici i naš Sportski savez sjednu i detektujemo koji je to klub, ali ja sada znam da od toga nema ništa kada se radi o sportu bez obzira šta je. Naravno mi imamo i danas reprezentativce Bosne i Hercegovine sa područja naše općine. Imali smo evo rahmetli Osmana Junuzovića koji je postigao značajne rezultate ne samo u Bosni i Hercegovini nego i u Evropi. Imamo danas karatiste, imamo stonotenisere, imamo i značajne šahiste koji postižu rezultate. Ne možemo sada reći svi podržavamo ovaj sport, a ovaj ne podržavamo. Trebamo podržavati svaki sport, ali do djece je i njihove talentiranosti i upornosti trenera kako će i u kojem pravcu ići i koje rezultate postizati. Mi smo pokušavali u nekom prethodnom periodu da npr. od dva kluba napravimo jedan, međutim ne možemo se dogovoriti, jer je ta neka naša sujeta jača od svega toga. Bilo bi nam puno lakše i postizali bi puno bolje rezultate i vjerovatno bi bili u nekom višem rangu. Što se mene tiče ja sam uvijek za da se ukupnjavamo, da se ne razilazimo. Sve u svemu poredeći puno veće i puno jače općine po budžetima i finansijama mi trebamo biti zadovoljni našim sportistima i postignutim rezultatima i prezadovoljni postignutim rezultatima prethodnih godina i ja se nadam da će i u narednom periodu postizati još bolje rezultate. Pomažemo im onoliko koliko je u našoj moći, nije to naravno dovoljno, ali evo iz godine u godinu povećavamo stavku za izdavanje za sport na području naše općine.“

Zerina Subašić je napustila sjednicu u 10,30 (opravdano)

Senada Džanić, predsjednica kluba vijećnika SBB - BPS: „ Sve vas selamim i pozdravljam. Osoba sam koja je puno puta bila predsjednik organizacionog odbora kada su u pitanju kulturna dešavanja i manifestacije na području naše općine. Slažem se da su naša udruženja i pojedinci maksimalno uključeni da se ista realizuju, takođe da naši sportski klubovi i ljudi koji rade sa našom omladinom daju svoj maksimum. Međutim u prethodnim diskusijama sam čula, ali se već puno vremena priča, a ništa se ne dešava, o osnivanju bosanskog kulturnog centra, o realizaciji prostora gdje se mogu dešavati u nekakvim adekvatnim uslovima ta kulturna dešavanja. Ja ću se ponovo vratiti na jednu od promocija knjige, mislim da je bila u januaru mjesecu u našem domu kulture i vjerujte ja, kada na Doboj Istok dolazi bilo ko iz drugog grada i iz druge općine, se osjećam domaćinski i bilo je malo nezgodno u domu kulture prvo što je neuredno, neuslovno i hladno sa onim svim plakatama okolo slušati jednu promociju knjige. Predsedavajući je bio prisutan tu i vjerujem da će se složiti da nam u tom dijelu treba bosanski kulturni centar. Treba nam prvo mjesto da bi građane mogli privući da dođu, jer ništa naše manifestacije nisu slabije i ne možemo ih se postiditi od manifestacija puno većih gradova. Mi smo organizovali prvu manifestaciju iz kulture sjećanja 11. jula i ta manifestacija bi bila puno drugačija da su uslovi i da je potpora bila veća. Zato evo apelujem na sve one koji mogu da pristupimo tome i da to se više ne odlaže i da ne pričamo svaki put kako težimo tome da nam je to prioritet. Svaki put se to ponavlja i ne dešava se ništa kada je u pitanju osnivanje i uređenje bosanskog kulturnog centra. Učenici osnovnih škola redovno posjećuju bioskop u Gračanici. Uz uređenje doma kulture mi bi svoju djecu mogli dovesti u naš bosanski kulturni centar. Izbjegli bi troškove i mogli bi više puta da djeci priuštimo tako nešto, a da ne pričam kako bi bilo lijepo i po mjesnim zajednicama da se omogući da se tako nešto uradi.“

Selmin Karić, predsjedavajući Općinskog vijeća: „ Ima li još prijavljenih? Ja bih se zahvalio svima koji su učestvovali u ovom anketiranju obzirom da smo mi na prošloj sjednici donijeli odluku vezano za sprovođenje redovnog godišnjeg anketiranja. Evo za vrlo kratko vrijeme to je sprovedeno s obzirom da smo u MEG projektu i jedan od razloga te brzine je i taj. Ja iskreno čestitam svima onima koji su učestvovali u provođenju ove ankete. Zahvaljujem se. Ko je za usvajanje Izvještaja o sprovedenom redovnom godišnjem anketiranju o zadovoljstvu građana sa zaključkom da je anketa validna?“

Glasanje: ZA – 16, PROTIV – 0, UZDRŽANIH – 0.

7. Razmatranje i usvajanje Izvještaja o radu Općinskog načelnika za 2021. godinu

Selmin Karić, predsjedavajući Općinskog vijeća: „ Tačku dajem na diskusiju. Ima li prijavljenih? Nema. Ko je za usvajanje?“

Glasanje: ZA – 10, PROTIV – 0, UZDRŽANIH – 6.

Izvještaj Općinskog načelnika je dobio potrebnu većinu.“

8. Razmatranje i usvajanje Izvještaja o radu Savjeta Mjesne zajednice Klokočnica za 2021. godinu

Selmin Karić, predsjedavajući Općinskog vijeća: „ Tačku dajem na diskusiju.“

Emira Karić, predsjednica kluba vijećnika SDP: „ Razdvojili smo izvještaje mjesnih zajednica i u redu je razdvojili smo informacije o upisu učenika i o uspjehu učenika u školama, ali je teško diskusiju usmjeriti samo prema toj tački, pa ću biti malo šira, odnosno odnosit će se na sve tačke. Mislim da sam i dosadna i možda mi je diskusija uvijek ista kada su u pitanju ove tačke, ali opet ću obrazložiti. Smatram da bi se morao zajedno sa pravnikom i službama uraditi način pisanja ovakvih izvještaja. Obrazložiti ću i zašto. Govorim generalno. U redu je neki su sadržajni a neki nisu, ali mi moramo raditi parametre, odnosno parametre usporedbe i onda je najbolje kada, opet ponavljam ko pamti prošlu godinu, gdje se kaže broj stanovnika evo sumirat ću, možda nije tačan redoslijed, broj održanih sjednica, infrastruktura, infrastrukturni projekti, ali da to kod svakog bude isto. Onda kada mi radimo neke usporedbe možda je negdje i više urađeno, a negdje bi trebali možda poboljšati. Ovako ima svako svoj način pisanja ovakvih izvještaja. Ne prozivam, ali voljela bih da predsjednik Komisije za statut izađe, jer je čak bio i ljut na neke izvještaje, koliko se sjećamo, na komisiji. Mi smo usmjerili hajmo dati jedan zaključak i reći da se zaista u budućnosti organizujemo kako biti izvještaji imali jedan jedinstveni obrazac. Ja ću podržati naravno sve izvještaje. Isto tako smatram da bi jednoobrazno trebali u savjetima mjesnih zajednica ili volontirati ili biti plaćeni ukoliko je to moguće. Mjesna zajednica Klokočnica ima budžet i ima profesionalno lice, gdje ljudi ne volontiraju, sjednice im se plaćaju. Imamo Brijesnicu Malu gdje nešto minimalno ima sekretar i predsjednik, a ostali rade volonterski. Malo smo u tim stvarima raštrkani, a mala smo općina i mislim da bi trebali ići prema jednoobraznosti, a podržat ću naravno sve ove izvještaje.“

Refik Šuvalić, vijećnik SDA: „ Gospodine predsjedavajući, zamjeniče, načelnice, kolegice i kolege, predsjednici mjesnih zajednica, predstavnici udruženja, pomoćnici načelnika srdačno vas selamim i pozdravljam. Mislim da smo u zaključcima sasvim dovoljno naveli, odnosno predložili da poboljšamo ove izvještaje. Mislim da oni zaključci idu u prilog tome i da bi nama vijećnicima, obzirom da nas ima raznih profesija, bilo to preglednije i lakše uočiti kako prihode, tako i rashode i aktivnosti. Kada su ovakvi izvještaji zašto ne bi donijeli određene zaključke kada treba nešto pomoći, mada ja znam da je načelnik sa službama stalno u kontaktu i stalna je saradnja i pomoć mjesnim zajednicama. Po meni ako se usvoje ovi zaključci da se tehnički vide tamo i prijedlozi za mjesne zajednice koje nemaju profesionalca, čini mi se da samo dvije imaju profesionalce i da Lukavica Rijeka ima mislim vremenski ugovor po pitanju tehničkog lica, da se odredi neki dan u sedmici, bar jedan, da građani imaju bolji pristup. Znači iz tog razloga nisam htio ni izlaziti, jer mislim da je u zaključcima sve navedeno.“

Hasan Hasančević, predsjednik kluba vijećnika SDA: „ Složit ću se sa oba diskutanta da treba da bude jednoobrazno, samo komparacija ili poređenje određenih mjesnih zajednica ne može nikako biti suštinski ista po svim oblastima. Moram naglasiti da sve i jedna mjesna zajednica imaju svoje budžete i sad je stvar koliki su budžeti. Jedni imaju 5.000 stanovnika, pa imaju veći budžet, a jedni imaju 1200 i 1300 pa imaju manji budžet. Tako da ne bih da zalazimo u te vrste detalja ovi imaju, ovi nemaju, svi imaju, samo je stvar koliko. Svi imaju potrebe opet kolike, jer jedni imaju 15 km putne komunikacije, a jedni imaju 7 km. Jednim

treba rasvjete kilometar, drugim 500 m i tako dalje. Suština rada savjeta mjesnih zajednica je da olakšaju život građana. Ja nikada ne diskutujem puno gdje su se potrošila sredstva, ako ja izađem na cestu, pa vidim da je otprilike zadovoljavajuće meni kao stanovniku određenog područja. Samim tim savjeti rade kako treba. Na čemu treba raditi u budućnosti? Mislim da je kolega iz Dobrovoljnog vatrogasno društva podijelio predsjednicima mjesnih zajednica neke dokumente, odnosno prijedloge gdje mi treba da zajedničkim snagama radimo na sprečavanju požara i bilo kakvih stvari u sistemu spašavanja ljudi, imovine i materijalnih dobara. Da se udružimo po statutu ako smo dobro svi iščitali statute savjeta mesnih zajednica, jer tamo doslovce stoji da je svaki savjet između ostalog obavezan i kada su poplave i požari i sve to dalje. Nije to samo doći na sastanak savjeta, biti sahat vremena i otići kući. Znači imaju ljudi obaveza i stvar je samo kako koordinirati sve i da nam bude svima ljepše i lakše i da bolje sarađujemo. Želim svim predsjednicima mjesnih zajednica i savjetima u budućem radu svako dobro i dobru saradnju sa lokalnim organima.“

Mehmed Mehinović, vijećnik SBiH: „*Gospodine predsjedavajući, dopredsjedavajući i uvaženi prisutni mislio sam stornirati od današnje diskusije, međutim ovo je nešto o čemu trebamo progovoriti par riječi kada govorimo općenito o svim izvještajima savjeta mjesnih zajednica. Ja u svoje lično ime i u ime stranke kojoj pripadam hoću da se zahvalim svim onima koji rade u savjetima mjesnih zajednica. Predsjednici rade ogroman posao, mi toga nismo ni svjesni, jer oni su prvi do građana, olakšavaju posao izvršnom organu općine. Ja znam da je dobra komunikacija sa predsjednicima savjeta mjesnih zajednica i trebamo raditi na tome da bude sve bolja i bolja i sve kvalitetnija i kvalitetnija, jer bi tim ljudima bilo lakše, a ujedno da bi olakšali rad izvršnom organu. U tom smislu možda je i do nas počev od vremena kada sam i ja bio prisutan da možda nismo odlučivali o nečemu, da možda nismo dovoljno vodili računa da ta sredstva koja pripadaju mjesnim zajednicama na neki način makar i blago povećavamo da imaju ljudi za one sitne intervencije. Naravno opština vodi računa o infrastrukturnim projektima, vidim da to ide kako treba i saradnja je dobra. Međutim, moramo svi uzeti na sebe dio krivice, jer trebamo u kreiranju budžeta pokušati da jednim dijelom pomognemo da ta sredstva, koja su svima neophodna, da ih na neki način povećamo na uštrb ne znam čega, a sada je solidno stanje u budžetu. U tom dijelu snosim i ja dio krivice da nismo ljudima pomogli da im olakšamo rad da mogu oni sitne intervencije napraviti, pomoći još nekim ljudima i tako dalje. Naravno slažem se sa prethodnicima koji su govorili o izvještaju i da ga treba kritizirati na neki način, međutim ako hoćemo tražiti od ljudi nešto valja ljudima nešto i dati. I ja sam zato da se kritizira, ali da to bude krajnje. Imamo puno izvještaja ljudi koji primaju plaće za to, pa ne naprave dobar izvještaj. Oni to naprave i može se vidjeti šta se radi i naravno oni mogu biti još puno bolji, ali moramo ljudima pomoći da to bude bolje. Naravno ne možemo očekivati da bude fantastičan izvještaj kao što je Centra za socijalni rad i JKP „Čisto“ itd. Međutim do nas je da Komisija za finansije i budžet napravi parametre o čemu su prethodnici govorili šta izvještaj treba da sadrži. Ja ovim ljudima zaista želim, a oni se znaju nametnuti izvršnom organu, a vjerovatno i načelniku i predsjedavajućem Vijeća, da se zahvalim jer to je rad za džabe, oni jednostavno daju svoje slobodno vrijeme. I to što dobiju ako dobiju negdje to nije ništa, to nije ni ono izgubljeno vrijeme, jer svi letimo prvo mjesnoj zajednici daj ovamo. Sve kompletno, za sve izvještaje želim svim članovima savjeta, a pogotovu predsjedavajućem savjeta da se zahvalim i evo nek se i oni bore, da uspostave bolju saradnju, a na nama je ovo o čemu sam pričao da pokušavamo, pa makar ako bude rebalans budžeta da povećamo onu stavku, da i oni imaju malo komocije i malo prostora da urade stvari po njihovim zamislima kako treba da urade.“*

Izet Hodžić, zamjenik predsjedavajućeg Općinskog vijeća: „*Poštovani načelniče, predsjedavajući, kolege vijećnici, poštovani predsjednici mjesnih zajednica, predstavnici udruženja građana, dragi gosti evo ja koristim priliku da vas sve poselamim i pozdravim. Moja diskusiju se odnosi na tačku dnevnog reda Izveštaj o radu Mjesne zajednice Klokočnica u protekloj godini. Koristim priliku, obzirom da je novi savjet konstituisan sredinom prethodne godine, da izađem za govornicu i da čestitam novom savjetu. Sa ovom čestitkom ne želim da umanjim rad dosadašnjih savjeta Mjesne zajednice Klokočnica, a ovo bar što ja vidim i što pratim je dobar rad. Kažem može biti bolje, ali izuzetno me raduje transparentan rad. Stavio sam sebe u poziciju građanina znači ono što građani mjesne zajednice Klokočnica treba da znaju šta radi savjet mjesne zajednice, koje su aktivnosti, koji su planovi, kad se održavaju sjednice savjeta mesne zajednice, koji je dnevni red, koji su zaključci, koje su odluke. Znam da se vodi računa o svakoj utrošenoj marki, pa prema tome želim iskreno da čestitam na ovakvom radu savjeta mjesne zajednice i da poručim samo tako da nastave, jer to je pravi pokazatelj svima nama kako se treba odnositi, kako se treba ponašati na poziciji koja će predstavljati interes građana, a u ovom slučaju građana Mjesne zajednice Klokočnica i normalno raspolaganju javnih sredstava. Ništa nije novo Refikova i Emirina diskusija, jer komisija u tački 6. piše*

preporuka savjetima mjesnih zajednica da one mjesne zajednice koje nemaju sekretara, a to je preporuka komisije, a trebala bi biti i preporuka Vijeća, da po procjeni savjeta mjesne zajednice odrede koji je to vremenski period. Znači komisija cijeni za potrebnim i ne vidim razloga zašto ne bi, jer ne možemo ništa zaključkom, možemo, ali treba sredstva za to pripremiti. Ovo je samo preporuka, tako sam ja shvatio, a tako i piše.“

Emira Karić, predsjednica kluba vijećnika SDP: „ Mogu dati repliku. Evo kolega Mehmed Mehinović vezano za povećanje, znači stvarno sam nekoliko puta podnosila amandmane na budžet da se određena suma uveća na konto mjesnih zajednica. Nije to bilo nešto enormno, to je bilo samo zbog, hajmo reći, nijeta komfora tih mjesnih zajednica koje nemaju budžet kakav ima, a vi ste rekli svaka mjesna zajednica ima budžet. Međutim neke su sretnije, pa imaju malo bolji budžet, pa time imaju i bolji komfor, a neke su nesretnije da tako kažem. Određeni parametar je vezano za škole, neke škole su sretnije, pa imaju sportsku dvoranu koju iznajmljuju pa 3.000 prihoda mjesečno i određeni komfor, dok neke škole nisu i ne mogu planirati takve prihode, odnosno neke projekte i moraju se orjentisati prema ministarstvu Kantona i Federacije itd. Znači to je hajmo reći sreća, ali i nečije zalaganje i svi trebamo težiti ka tome da na neki način privređujemo i da imamo taj komfor na lično zadovoljstvo svih građana. Kolega Izete, da to su bile preporuke i ne znam da li sam pročitala preporuku koju sam takođe imala na komisiji, a to je da se odredi tačno vrijeme i da se to vrijeme stavi na vrata svih mjesnih zajednica, a to je vrijeme kada građani mogu doći u prostorije mjesne zajednice i da se stvarno odredi to vrijeme. Mislím da su se građani malo udaljili da li zbog nemanja tog tajminga, tog tačnog termina i da idemo u tom smjeru. Može to biti u 15 dana, ja ne znam kako ko ima vremena i kako funkcionišu ti savjeti mjesnih zajednica, ali da zaista građani znaju da je to četvrtak od 10 – 15 ili 17 u Brijesnici Maloj ili Stanić Rijeci ili utorak. Stvarno bi bilo najbolje da se odredi da i ovo bude jednoobrazno da i ovo bude u četvrtak od 17 – 19, pa da svi građani onako imaju u ušima da ne brkaju termine, ali kažem to je i dalje preporuka.“

Kemal Bratić, općinski načelnik: „ Nadam se da neću izazvati replike. Slušam diskutante i kao što Hasan kaže podržavam sve diskusije. Moram se osvrnuti na nekoliko bitnijih činjenica kada se radi o savjetima mjesnih zajednica. Za mene je najbitnije da na području naše općine savjete mjesnih zajednica biraju građani i to je pod broj jedan za razliku od nekih nama susjednih općina, odnosno gradova gdje to radi vijeće. Znači građani su birali i ljudi preuzeli odgovornost i ja koliko znam, u svim savjetima je došlo do promjene, nova su rukovodstva i ovo je njima prvi izvještaj. Uvijek sam bio zagovarač onoga radi dobro pa ako ti izvještaj i nije baš napisan, svi mi znamo šta je izvještaj, neko može napisati, frizirati, nacrtati, pa malo slikovnice napraviti i onda je on kao dobar, a nije. Na terenu je najbitnija stvar. Ja sam primijetio jedan dobar zaokret, kao što Izet kaže da se neko od prethodnih ne uvrijedi, a i ja sam bio 2003. godine predsjednik mjesne zajednice, jedan dobar zaokret u svim savjetima mjesnih zajednica. Mi smo imali u prethodnih 8 godina da jedan savjet mjesne zajednice nije nikako održavao sjednice, ali eto sada je i tamo stanje dobro. Imali smo u jednom savjetu gdje je samo jedan čovjek sve radio. Građani dolaze, po mojim informacijama, do naših mjesnih zajednica, a ja znam zašto, jer svaki dan je u pošti jedan ili dva zahtjeva od savjeta mjesne zajednice za ovo ili za ono. Najbitnije je da su ljudi aktivni, a ne kako je izvještaj napisan. Ja se neću složiti da služba za finansije pravi urnek izvještaja o radu savjeta mjesnih zajednica i ja predlažem da to Komisija za statut i propise Općinskog vijeća uradi, a ako hoćete pozovite i predsjednike savjeta mjesnih zajednica pa zajedno usaglasite taj urnek. Možda bi to bilo dobro, ali vjerujte i vjerujem da će se većina vas složiti, da je bitno da ljudi rade na terenu. Ima nekih stvari koje treba promijeniti i govorim generalno za izvještaje svih savjeta. Ja prvo prisutnim predsjednicima čestitam na preuzetoj odgovornosti bez obzira ako neko od njih ima neku naknadu, to je volonterska naknada. Ne mogu otići ni u trgovinu, ne mogu otići ni u džamiju, ni bilo gdje drugo da im neko ne otvori neku temu isto kao i vama vijećnicima, kao i meni načelniku, o infrastrukturi ja bih ovako, ja bih onako. Svi mi znamo kako bi trebalo, ali treba obezbijediti pod broj 1. sredstva i nakon toga realizovati određene projekte na području naše upćine. Ja još jednom čestitam izabranim članovima savjeta mjesnih zajednica, a sa predsjednicima sam održao sastanak zajedno sa svojim saradnicima i direktorima javnih preduzeća i ustanova i stavili smo se na raspolaganje svim savjetima mjesnih zajednica 24 sata za sve ono što je u našoj moći. Kada se radi o povećanju sredstava nisam protiv toga, ali tamo nekad davno i prije nego što sam ja imenovan za načelnika je bilo za rad i za kancelarijski materijal, jer takva je odluka donesena za izdvajanje 4 hiljade i nešto KM koje mi svake godine 100% isplaćujemo na račun savjeta mjesnih zajednica. Evo ja sam raspoložen da razgovaramo i o povećanju ako će to otići prema građanima, a ne da to damo kao što dajemo nekim udruženjima sredstva, pa odu u pogrešnom pravcu.“

Selmin Karić, predsjedavajući Općinskog vijeća: „ Zahvaljujem se načelniku. Ima li još prijavljenih? Kako vidim mi smo malo pogriješili, pa mislim da kada budemo sljedeći program radili treba sve pod jednu tačku svrstati ponovo, jer vidite da se sve to isprepliće. Zaključujem tačku i dajem na izjašnjavanje. Ko je za usvajanje Izvještaja o radu Savjeta Mjesne zajednice Klokočnica za 2021. godinu?“

Glasanje: ZA – 16, PROTIV – 0, UZDRŽANIH – 0.

9. Razmatranje i usvajanje Izvještaja o radu Savjeta Mjesne zajednice Brijesnica Velika za 2021. godinu

Selmin Karić, predsjedavajući Općinskog vijeća: „ Tačku dajem na diskusiju.“

Kemal Skopljak: vijećnik BPS: „ Ja bih imao dva pitanja da postavim predsjedniku Mjesne zajednice Brijesnica Velika i da iskoristim njegovu nazočnost današnjem Vijeću. Interesuje me kao i sve građane u Brijesnici Velikoj da li je išta dogovoreno sa izgradnjom ili preuzimanjem od Mirse Durmića ovog objekta vezano za ambulantu i poštu? Da li je postignut kakav dogovor vezano za taj objekat, da li će se izmještati ili preseliti kod njih dole? Zna da smo puno pričali o tome. Još jedna stvar, da li je razgovarano sa novim vlasnikom vezano za otpadne vode? To stvarno interesuje građane, jer dosadašnja kanalizacija koja ide od škole i zgrade ide faktički u bare i izljeva se po njivama. Možda bi trebalo vidjeti i iskoristiti priliku, pa da se nešto po tom pitanju uradi zajednički. Iskoristiti i njihovo učešće i naše na neki način.“

Ermin Mujkanović, predsjednik Savjeta Mjesne zajednice Brijesnica Velika: „S obzirom da prvi puta izlazim sve vas srdačno selamim i pozdravljam. Ja vjerujem da je vijećnik Kemal Skopljak možda već u međuvremenu dobio informacije u vezi ta dva pitanja koja je postavio. Mi smo kao Savjet Mjesne zajednice stavili se na raspolaganje vlasnicima Belamioniksa. Njihov direktor pravne službe u stalnom je kontaktu prvenstveno sa mnom. Tu smo mu pomogli najviše uz pomoć vijećnika Đonlagića za izmještanje kablova BH Telekoma, zatim imovinske odnose da dovedu sebi struju. Takođe smo razgovarali iz razloga što je prethodni vlasnik zgrade i nekretnine sa nama dolazio u neke dogovore da napravimo, međutim nismo se mogli dogovoriti, a oni nemaju nikakvih zahtjeva po pitanju izmještanja ili bilo kojeg dogovora za zgradu mjesne zajednice. Čak šta više u određenom dijelu po pitanju međa nisu išli do kraja nego su jedan metar odvojili od nas, jer imaju dovoljan prostor da naprave i vanjski parking i unutrašnji. Što se tiče otpadnih voda, ja vjerujem obzirom da je projekat od 150.000 KM i vjerovatno je planiran neki bio prečišćivač ili neki kolektor gdje će oni sakupljati te otpadne vode, a vjerovatno ne mogu dobiti vodnu dozvolu ako to nemaju i mislim da je to riješeno nekim vodnim aktima prethodnom vodnom i vodnom saglasnosti. Ako bude potrebe i te oborinske vode moramo negdje odvesti obzirom da je njihov krov 5 duluma i tu ćemo naći neko rješenje da bude i u njihovu korist, a i u korist mještana Brijesnice Velike.“

Selmin Karić, predsjedavajući Općinskog vijeća: „ Zahvaljujem se. Zaključujem diskusiju. Ko je za usvajanje Izvještaja o radu Savjeta Mjesne zajednice Brijesnica Velika za 2021. godinu?“

Glasanje: ZA – 16, PROTIV – 0, UZDRŽANIH – 0.

10. Razmatranje i usvajanje Izvještaja o radu Savjeta Mjesne zajednice Brijesnica Mala za 2021. godinu

Selmin Karić, predsjedavajući Općinskog vijeća: „ Tačku dajem na diskusiju.“

Emira Karić, predsjednica kluba vijećnika SDP: „Ja bih takođe postavila pitanje predstavniku Mjesne zajednice Brijesnica Mala, zvanično, budući da je trebalo doći do asfaltiranja puta od Karić Brajke i Karić Ibrahima do Karić Rudbila, a to je bilo obustavljeno iz određenih razloga i trebalo je prije asfaltiranja uraditi kanal za te oborinske vode na tom potezu. Samo da pitam do koje faze je došlo i da li je došlo do pomijeranja odnosno da li ćete uskoro riješiti taj asfalt, odnosno taj kanal da otpadne vode?“

Amir Mašić, sekretar Mjesne zajednice Brijesnica Mala: „ Sve vas srdačno selamim i pozdravljam. Vezana za pitanje mi smo organizovali sastanak sa tim mještanima, a bili su i predstavnici iz Općine. Pozvali smo ih da se dogovorimo, međutim oni nisu spremni da napravimo neki sporazum. Određeni dio građana je htio da se kanalizacija odvede javnom površinom i javnim putem dole u jednom dijelu ona bi prošla i privatnim parcelama. Međutim u tom dijelu gdje bi prošlo privatnim parcelama vlasnik jedne

parcele je došao sa određenim uslovima da se neka kao naknada obezbijedi od mjesne zajednice, da se sa parcelom kojom međi sa vlasnikom te parcele dogovori da ako bi išla eventualno ta kanalizacija da se prokopa po međi po pola metra sa jedne i druge strane, da se ucijevi dole pored magistralnog puta i da mu se ulaz obezbijedi. Naravno mi smo rekli da ćemo prenijeti to na Općinu i mislim da je čak i dolazio. Koliko znam to je pored ceste i o tom njegovom zahtjevu za ucjevljenje bi trebala raspravljati valjda Direkcija cesta. Stalo je na tome i on je bio u Službi za prostorno uređenje i ne znam šta su dogovorili. Znam da su došli ljudi da asfaltiraju, jedan građanin je izašao i to je sve stalo.“

Selmin Karić, predsjedavajući Općinskog vijeća: „ Zahvaljujem se. Ima li još prijavljenih? Nema. Zaključujem diskusiju. Ko je za usvajanje ovog Izvještaja?“
 Glasanje: ZA – 16, PROTIV – 0, UZDRŽANIH – 0.

11. Razmatranje i usvajanje Izvještaja o radu Savjeta Mjesne zajednice Stanić Rijeka za 2021. godinu

Selmin Karić, predsjedavajući Općinskog vijeća: „ Tačku dajem na diskusiju.“

Senada Džanić, predsjednica kluba vijećnika SBB - BPS: „ Danas je lijepo izaći za ovu govornicu i biti vijećnik iz Stanić Rijeke. Zašto ovo govorim? Iako su neki smatrali prošle godine da se radi politikanstvu, nije bilo to u pitanju. Sugerisala sam i kroz izvještaj pokušala da skrenem pažnju, iako ste podržali taj izvještaj, da je Mjesna zajednica Stanić Rijeka ta koja nije imala sastanke, da građani nisu imali gdje da se obrate, da se više nije znalo ni ko je predsjednik ni ko je sekretar, da kada podnesem ovdje inicijativu znam da bi redosljed trebao biti Mjesna zajednica – Općinsko vijeće i da bi trebala postojati saradnja. Međutim evo, hvala Bogu, desile su se promjene i to promjene uistinu mislim da nisu nigdje bolje nego kada je u pitanju Savjet Mjesne zajednice Stanić Rijeka. Prvo mi je drago što predsjednika vidim ovdje, jer znate da je prošli predsjednik, nagađali smo ko je i da je bio sekretar i v.d. pa je bio odsutan u Njemačkoj, a tamo stoji ona naknada. Ne znam kako će se to riješiti ili će samo da se prešuti, jer nije bio ni prisutan kod usvajanja izvještaja. Građani biraju, ali građani daju određeno povjerenje koje mi trebamo opravdati. Trenutno u Savjetu Mjesne zajednice Stanić Rijeka građani mogu kontaktirati, postavljati pitanja, znaju kome se obratiti. Na kraju krajeva već nakon kratkog vremena imamo već neke od ključnih problema koje muče Stanoriječane u izvještaju, vidi se volja, vidi se rad i ja stvarno čestitam sadašnjem Savjetu Mjesne zajednice. Ovdje stoji kaže za period januar – septembar nemamo saznanja o aktivnostima starog saziva. Pošto je Mirsad Husaković bio član i tada Savjeta Mjesne zajednice pitam se kako nema informacija o tome šta se dešavalo, jer je i sada član Savjeta. Gospodo usvojili ste izvještaj prošle godine, usvojili ste, a ni meni nije bilo svejedno, jer znam da su to moji sugrađani koji su glasali i izabrali te ljude. Nije mi bilo svejedno biti protiv tog izvještaja, ali znam da sam bila u pravu da godinu dana se nije otvorila kancelarija, prostorija u Mjesnoj zajednici Stanić Rijeka. Sad u prethodnim diskusijama sam čula da se znalo da ima savjeta koji nikako ne rade, da se znalo da jedan čovjek radi. Smatram da je ovo Vijeće trebalo već tada presjeći isto pošto smatram da bi osobe kao evo što je gospodin Delić i slični trebali raditi. Hvala što ste na ovaj način pristupili, jer građani Stanić Rijeke to zaslužuju i Stanić Rijeka ima puno, da kažem, jako bitnih, a neriješenih problema. Mislim ako Savjet ovako nastavi da radi da će to, ako Bog da, ići u boljem pravcu.“

Haris Sinanović, predsjednik kluba vijećnika SDP – SBiH: „ Pozdravljam sve prisutne. Možda ću ponoviti neke stvari što su kolegica Senada i načelnik rekli. Prvo bih pohvalio novi saziv Mjesne zajednice Stanić Rijeka, jer je primjetno kroz čitavo selo da su se pokrenule neke aktivnosti i to vidi svaki građanin. Onaj ko hoće da vidi vidjet će, a onaj ko neće da vidi i neće vidjeti. Jedino šta me ovdje bode, a govorim sada o izvještaju ovom, a osvrnut ću se i na prošli izvještaj, jer je povezano. Bit ću malo konkretniji vezano za ovo što je Senada govorila. Volio bih da me hoće neko pobiti, a zamolio bih novog predsjednika Savjeta Mjesne zajednice da izađe i kaže, jer vjerujem da ima saznanja, a radi se o tome da je u prošlom izvještaju falsifikovan potpis v.d predsjednika mjesne zajednice Esada Hasanamidžića koji je bio u Njemačkoj. On je u prošlom sazivu imao po odluci Savjeta Mjesne zajednice naknadu kao sekretar od 300 KM. Jedno vrijeme od godinu dana ja mislim novembar 2020. godine poslije lokalnih izbora, pa mislim do decembra 2021. godine neko nepoznato lice podizalo 300 KM svaki mjesec sa bankovnom karticom Mjesne zajednice Stanić Rijeka i tu dolazimo do iznosa od 3.900 KM. Što Senada reče znači tri člana Savjeta Mjesne zajednice sadašnjeg su bili i u prošlom sazivu, koliko ja znam, Mirso Husaković, Miralem Dedić i Jakub Dedić i morali su imati saznanja. Ako ništa moralo se tih 3.900, ako griješim možda je 3.000, u ovom bilansu stanja i bilansu

uspjeha negdje uvrstiti ili zamijeniti, jer taj novac nedostaje. Molio bih ako može predsjednik da nam kaže ima li ikakva saznanja vezano za to.“

Senada Džanić, predsjednica kluba vijećnika SBB - BPS: „ Sjetila sam se još jedne situacije, a pogotovo me ponukalo ovih 300 KM koje su primljene ni za što. O tome smo mi govorili prošle godine i ponovo se vraća. Vi ste podržali to. Ja da sam vidjela da neko u mojoj mesnoj zajednici nešto radi sigurno bih digla ruku, da li se slagala ili ne slagala ne bih bila protiv. Hoću samo sa vama nešto podijelim, na poligonu Područne škole Stanić Rijeka jedna od onih stativa je već bila kao da pada. Znači obraćala sam se usmeno i pismeno, međutim nema odgovora. Vi znate da je takvih dešavanja bilo gdje su djeca gubila živote i na kraju sam uzela kovertu i uručila svakom članu Savjeta onim kojim sam mogla, a ostalim poslala preporučenom poštom da bi se reagovalo. Da vam kažem sve ovo govorim iz razloga što sam prošle godine apelovala i tražila, jer nema predstavnika Savjeta Mjesne zajednice Stanić Rijeka, nemamo izvještaj, imamo upitan potpis, sekretar se nalazi u Njemačkoj, prikazuje se da se plaća, a vi ste podržali takav izvještaj.“

Hasan Hasančević, predsjednik kluba vijećnika SDA: „ Podugo sam ovdje u ovoj sali i kada god su izvještaji savjeta mesnih zajednica imamo problem sa Stanić Rijekom. Ako se budemo vratili 10 godina unazad, ja ću otići u kancelariju pa izvaditi od udruženja građana koliko je potrošeno sredstava nekih bivših predsjednika i ne bih da se vraćamo. Sjedite, iskristališite i pustite čovjeka, jer svi ste rekli da je prihvatio da radi kako treba. Sjedite i iskristališite, ako ima neko da je pogriješio i promašio neka ispravi i idemo dalje. Licitirati imenima za govornicom, prvo nije fino nema prisutnih. Ja nisam ničiji advokat niti koga branim, ali ćemo se vratiti prije starog saziva, jednog, drugog i trećeg. Šta su neki ljudi morali raditi privatno i odrađivati da bi izmirili dugove mjesne zajednice. Nemojte se vraćati na to, idemo naprijed.“

Agan Delić, predsjednik Savjeta Mjesne zajednice Stanić Rijeka: „ Sve vas selamim i pozdravljam. Vrlo je nezgodno pričati o stvarima i odgovornostima koje ne pripadaju osobi, ali ću vrlo kratko. Kada sam radio primopredaju sa starim predsjednikom savjeta isti je bio u Njemačkoj. Vrlo teško smo stupili u kontakt i kad se napokon pojavio oko nove godine, napomenuo sam mu da nije radio i da nije održao ni nijednu sjednicu savjeta, da je primao nadoknadu i da je imao službeni telefon. Međutim, statut ga odbranio i ja nisam mogao ništa preduzeti. Znači po statutarnim odredbama morao je ostatak Savjeta reagovati ili građani da ga smijene i da uspostave normalan rad Savjeta. Život nije mogao stati i ja sam morao nastaviti, napravio sam svoj plan i meni je drago što čujem ovdje pohvale. Ja životu pristupam tako ili radi nešto kako treba ili nemoj nikako raditi. Rekao sam kolegama u Savjetu prvi put kad ne sazovem sjednici savjeta na vas zahtjev ili zahtjev građana vi me smijenite. Ja sam čovjek u godinama, bolestan, nije mi do ove igranke, ali sam prihvatio s radošću i čašću da nešto napravimo. Pokrenuli smo nekakve projekte, aplicirali za neke infrastrukturne projekte, pokrenuli smo i izgradnju spomen parka na Haskić kamenu i moram izraziti zadovoljstvo podrškom koju uživam od općinske administracije na čelu sa gospodinom Bratićem. Posebno moram istaknuti da Savjet kojim ja predsjedavam da nije bilo poziva koji sam uputio, a da se oni nisu odazvali. Čak i građani na moj poziv podržite me radimo to i to, svi su bili tu, izuzev ako je neko bio bolestan. Još jednom podvlačim ne mogu odgovarati za nečije greške i ja tu odgovornost ne mogu prihvatiti. Uglavnom spominjana je cifra, gospodin Sinanović je spomenuo cifru i tačno se uklapa u paušal i tu je sve čisto. Završni račun je urađen i prihvaćen i ja tu nemam šta više dodati.“

Haris Sinanović, predsjednik kluba vijećnika SDP – SBiH: „ Da ne bi bio pogrešno shvaćen, moram ponoviti znači pohvaljujem novi saziv Savjeta Mjesne zajednice sa predsjednikom Savjeta Delić Aganom. Ovo što sam rekao vezano za naknadu od prošlog predsjednika od 300 maraka, ja sam samo tražio informaciju od Agana i evo potvrđuje, pošto u izvještaju ništa ne piše. A što kaže kolega Hasan da trebamo ići naprijed, slažem se da trebamo ići naprijed. Napominjem još jednom da nam se ne bi dešavalo, jer falsifikovanje potpisa je krivično djelo kao što je bilo u slučaju prošlog izvještaja Savjeta mjesne zajednice Stanić Rijeka. Nemoguće da je on bio u Njemačkoj i svi znamo da je bio u Njemačkoj, a njegov potpis stoji i jedino ako su mu preporučenom poštom poslali u Njemačku pa vratili. Samo sam to napomenuo da se ne bi više dešavalo, a to da njega statut brani vezano za to da opravda te novce koje je neko drugi podizao za njega, ne bih rekao da ga statut može tu odbraniti, jer nije bio u državi i nije mogao obavljati dužnost. Trebalo bi pokrenuti neki postupak ili formirati komisiju u Savjetu Mjesne zajednice da ispita te stvari.“

Senada Džanić, predsjednica kluba vijećnika SBB - BPS: „ Stvarno ću kratko i moram ponoviti obzirom da je replika na ono što je rekao kolega Hasan Hasančević. Ja ponovo čestitam i vama predsjedniče Savjeta i cijelom Savjetu i želim vam puno uspjeha u radu. Bilo kako ako ja mogu pomoći kao građanin kao

vijećnica uvijek ću stajati na raspolaganju. Evo samo ću ponovo pročitati za period januar – septembar 2021. godine nemamo saznanja o aktivnostima starog saziva Savjeta Mjesne zajednice, pa tako o njima ne možemo izreći svoj sud. Znači ja nijednog momenta ovo što reče uvijek je problem Stanić Rijeka, više nije. Na početku sam rekla hvala Bogu, jer lijepo je kad iz Stanić Rijeke dođe ovakav izvještaj, kad imamo predsjednika Savjeta ovdje prisutnog, da bi smo mi mogli izvesti svoj sud. Sve ovo što sad pričamo pričalo se i prošle godine, sve smo ovo znali, a vi ste podigli ruku i usvojili takav izvještaj. Znači ne možemo samo prelaziti preko takvih stvari. Građani Stanić Rijeke najmanje dvije godine nisu imali kome da se obrate. Ja sam pokušavala i mislim da sam vam to bila predočila. Nismo trebali tako jednostavno podići ruke, izvještaj usvojen, sekretar u Njemačkoj, a te nadoknade, hajde, a velike su to cifre za nerad.“

Kemal Bratić, općinski načelnik: „ Ono što želim reći je da Savjet Mjesne zajednice treba da bude na posebnom mjestu svih nas, jer znamo svi šta su prošli u periodu '92 – '95. Mogu slobodno reći da su prošli ono najgore od svih mjesnih zajednica ne umanjujući ni jednu drugu mjesnu zajednicu. Ja neki dan dobih dopis anonimno da su predstavnici neke ustanove tražili prodaju neke mašine nekom udruženju, pa nešto da izvlače pare. Ne znam ni ja šta je i neću da vjerujem u to. Svako od nas snosi odgovornost za ono što radi ili što će raditi u budućnosti. Ja neću biti ni tužioc ni sudija, a ne možete to biti ni vi. Naravno svi znate kome se treba obratiti za nešto što mislite da je urađeno kako ne treba. Ne treba abolirati nikoga ako je uradio nešto kako ne treba, ali ovdje pričati mislim da ovo nije mjesto da se priča o tome. Znam dobro prije 7 – 8 godina jedan savjet mjesne zajednice smo smijenili i uveli povjereništvo iz nekih razloga. Tada smo vidjeli da ima svega i dosta je gore nego što je ovo sada, imamo te dokumente i nije niko ništa otvarao, nije niko ništa dirao. Ponavljam nemojte da me neko krivo shvati, ne branim nikoga ko je radio kako ne treba. Ako ovdje predsjednik Savjeta Mjesne zajednice kaže da je to sve u redu i ja hoću da mu vjerujem. Znači on je taj ko je odgovorno lice u Savjetu Mjesne zajednice trenutno i on je taj koji nam je ovdje javno rekao da je to propisano statutom. Mi smo jedne prilike donijeli zaključak da se statuti savjeta mjesnih zajednica moraju uskladiti sa Statutom Općine. Oni nisu usklađeni i ja pozivam predsjednike savjeta mjesnih zajednica, jer mislim da je to najbitnije. Dajte evo Omer sekretar vam je na raspolaganju i drugi pravници i pravobranioac dajte da nam to bude prvi zadatak u ovoj godini da uskladite statute savjeta mjesnih zajednica, jer oni su davno nekada doneseni i nisu mijenjani. Ima tu možda nekih nelogičnosti i stvari koje se mogu izmijeniti, ima tu možda stvari koje vama otežavaju rad. Znači evo da uzmete pred sebe, a naravno stoji vam na raspolaganju, pretpostavljam, i Komisija za statut i propise. Znači treba da idete u tom pravcu da statute uskladite, jer oni sada nisu u skladu sa Statutom općine Doboj Istok. Ponavljam najbitnije za mene kao legalistu je da mi imamo demokratske izbore za savjete mjesnih zajednica, da ih ne bira vijeće ili neko drugi. Kako su građani odabrali sami su sebi odabrali. Mislim da su ovo sve odgovorni ljudi i da će u narednom periodu raditi bolje nego što je to neko prije njih radio.“

Senada Džanić, predsjednica kluba vijećnika SBB - BPS: „ Načelniče, s obzirom da ste dobili nepotpune informacije voljela bih da ste mene pitali i ja bih vam rado dala odgovor o nekakvoj mašini i sada ću vam reći o čemu se radi. Ministarstvo za kulturu sport i mlade je raspisalo... Moram dati repliku obzirom da se osjećam prozvanom. Samo da vam kažem ta mašina je došla u srednju školu i prva je nova mašina, načelniče, koja je došla za učenike tekstile škole. To što je radilo Vijeće mladih općine Gračanica, to sam ja pitala naša udruženja zato što smo tako mogli aplicirati na taj projekat. Na kraju je odobreno je 3.000, a projekat je bio 3.600 i nešto pa su namirili radnici škole. Toliko je sve, načelniče, transparentno, pa bilo šta ako treba vezano za mašinu rado ću vam objasniti. Očekivala sam da nam čestitate i za tu manifestaciju. Kažem vam prva mašina za učenike tekstilne škole, a to je deficitarno zanimanje.“

Samir Džanić, vijećnik NL Doboj Selvid Hurtić: „Pošto prvi puta izlazim za govornicu ne bih da se ponavljam. Ja bih sve da vas poselamim i pozdravim. Moje pitanje je predsjedniku Mjesne zajednice Stanić Rijeka. Znači prvo da pohvalim njegov rad i da pitam Stanić Rijeka Škola koliko je uvrštena i da li imaju kakva saznanja na sastancima u sadašnjem sazivu.“

Agan Delić, predsjednik Savjeta Mjesne zajednice Stanić Rijeka: „ Ja u Savjetu imam predstavnika iz entiteta RS. Znači mi imamo zajedničke interese, pijemo istu vodu, dišemo isti zrak, međutim teško je aplicirati za neki infrastrukturni projekat koji se preklapa sa Republikom Srpskom. Koliko je meni sada poznato to ide sada preko udruženja građana. Međutim stojim na raspolaganju za bilo kakvu pomoć za upućivanje zahtjeva ili pomoći pri izradi projekta ja sam tu, to nije problem. Problem je ovaj administrativni dio, preklapanje Republika Srpska – Federacija i taj problem imamo i sa Hodžićima i sa Školom.“

Selmin Karić, predsjedavajući Općinskog vijeća: „ Zahvaljujem se. Ima li još prijavljenih? Nema. Zaključujem raspravu. Ko je za usvajanje Izvještaja o radu Savjeta Mjesne zajednice Stanić Rijeka?“

Glasanje: ZA – 16, PROTIV – 0, UZDRŽANIH – 0.

Predsjedavajući je dao pet minuta pauze.

12. Razmatranje i usvajanje Izvještaja o radu Savjeta Mjesne zajednice Lukavica Rijeka za 2021. godinu

Selmin Karić, predsjedavajući Općinskog vijeća: „ Tačku dajem na diskusiju. Ima li prijavljenih? Nema. Zaključujem raspravu. Ko je za usvajanje Izvještaja?“

Glasanje: ZA – 16, PROTIV – 0, UZDRŽANIH – 0

Fehim Alihodžić, predsjednik Savjeta Mjesne zajednice Lukavica Rijeka: „ Prvo da vas sve poselamim i pozdravim i da se zahvalim na jednoglasno usvojenom izvještaju. Vidio sam kroz vaše diskusije da odlično razumijete probleme sa kojima se susreću savjeti mjesnih zajednica. Vidim da ima i inicijativa da nam pomognete, jer mislim da je nedostatak sredstava najveći problem, a da u nama, bar ja govorim u svoje lično ime, možete imati najbolje ogledalo, najbolji pregled stanja u mesnoj zajednici i da ćemo se staviti na raspolaganje maksimalno. Hvala vam. Molim vas pomozite nam sa povećanjem sredstava za rad, mislim da su stvarno minimalna. Imamo sekretara koji radi jednom sedmično skoro bez naknade, održavamo sjednice i trudimo se da sredstva koja dobijemo kao pomoć u izgradnji da ih obogatimo i da projekat koji košta ovoliko mi dodamo još toliko sredstava da bude veći i bogatiji, a sve u cilju da građani budu zadovoljni.“

13. Razmatranje i usvajanje Izvještaja udruženja građana o utrošku dodijeljenih budžetskih sredstava za 2021. godinu sa završnim računom

Selmin Karić, predsjedavajući Općinskog vijeća: „ Tačku dajem na diskusiju.“

Emira Karić, predsjednica kluba vijećnika SDP: „ Ova tačka je objedinjena i drago mi je, ali ja ću se samo dotaći Udruženja Proaktiva. Dotaknut ću se jedne manifestacije za koju sam stvarno bila izuzetno radosna, a to je manifestacija Šampioni znanja. Mi smo krenuli u taj projekat realizacije manifestacije i prvo smo se susreli sa šefom Službe za društvene djelatnosti, krenuli u realizaciju te manifestacije. Iskrena da budem toliko smo primili mejlova i toliko telefonskih poziva kako bi se ta manifestacija realizirala da sam ja očekivala, iskrena da budem, malo veću glamuroznost. Takođe ću da budem iskrena malo veće nagrade, iako se može reći da se poklonu ne gleda u oči, ali kažem nakon tolikih poziva i nakon tolikih mail poruka mislila sam aha ovo je nešto što jedva čekam da prisustvujem. Vidjela sam i roditelji i učenici lijepo su se i svečano obukli, pripremili frizure i čekali tu manifestaciju. Ona je se takođe, evo ja ću osvrnuti na diskusije kolegice Senade, održala u po meni u neadekvatnom prostoru kada je u pitanju ta manifestacija. Smatram da je trebao biti malo drugačiji prostor. Imamo mi prostora na općini Doboj Istok, a to su ili sportske dvorane ili ne znam. Evo mi smo uradili i veliku salu u OŠ „Brijesnica“, pa mogu reći sa jednom lijepom i čak su sebi dozvoliti da kažem glamuroznom pozornicom koja evo zadovoljava i zaista ćemo izaći svakom u susret kada su u pitanju ovakve i slične manifestacije. Ovdje vidimo transparentno šta su učenici dobili, međutim ja lično nisam bila zadovoljna i onda sam malo na neke muke sebe dovela, naravno tu je bila i direktorica Senada i tadašnji direktor Mersed i morala sam završiti tu manifestaciju sa nečim, da tako kažem, boljim. Mi smo djecu odveli na jednodnevni izlet u Sarajevo i hoću da kažem završili smo tu manifestaciju mada nismo osobe iz Proaktive o tome obavijestili. Odveli smo ih na izlet besplatan u Sarajevo, ali to nije bio samo izlet, to je bila posjeta Muzeju ratnog djetinjstva. Takođe i ta posjeta nije bila samo posjeta, učenici su tri sata sudjelovali na interaktivnim radionicama koje ostavile jako pozitivan i dobar efekat na učenike koji su izabrani, kao i roditelje koji su opisom učenika kasnije tog dana takođe bili zadovoljni. Opet ću reći drugarski, prijateljski, jaranski mi se moramo međusobno u ovakvim stvarima dogovarati gdje bi nam bilo izloženo to i to smo planirali, tu i tu itd. Mislim da su te stvari bile izostale i mislim da bi mi imali tih prijedloga, pa da zaista ta manifestacija bude na još većem nivou. Takođe dotaknut ću se Izvještaja o radu Dobrovoljnog vatrogasnog društva Doboj Istok i kada vidim ovu prvu stranicu vjerujte evocira mi uspomene na moje djetinjstvo. Ja sam bila član jednog dobrovoljnog vatrogasnog društva, pa eto i popela se na neku ljestvicu i dobila sam zvanje vatrogasnog podoficira. Jako mi je drago što

imamo Dobrovoljno vatrogasno društvo, a isto moram reći prilikom donošenja odluke o osnivanju profesionalne jedinice ja sam imala amandman koji je imao član da na općini Doboj Istok postoji mogućnost osnivanja Dobrovoljnog vatrogasnog društva. Vi svi znate da ste odbili taj amandman i evo već 12 godina nažalost ni jedan amandman od strane ni mene, a ni kluba SDP nije podržan. Drago mi je da postoji, a znam da zakonski ovo Dobrovoljno vatrogasno društvo nema dovoljno nadležnosti, ali sve to rješava politika. To su stvari koje se mogu rješavati da li nekim susretom, da li oficijelnim pozivom. Mislim da bi se morale i te stvari promijeniti. Evo imamo i predstavnika koji bi više mogao o tome reći, mislim da su potrebne malo veće nadležnosti ovom Dobrovoljnom vatrogasnom društvu. Trenutne zakonske procedure im ne dozvoljavaju, čak im ne dozvoljavaju mnoge druge stvari. Isto tako se nadam većoj saradnji kada su u pitanju škole na području općine Doboj Istok i kada su u pitanju neke manifestacije. Mislim da ćemo sa World vision uspostaviti neku saradnju i da će biti neke vježbe i ja se tome iskreno radujem.“

Senada Džanić, predsjednica kluba vijećnika SBB i BPS Sefer Halilović: „Ponovo ću čestitati na radu svim udruženjima, ali nećete mi zamjeriti valjda što sam žena i želim istaknuti Udruženje žena koje je uistinu jedan od najboljih ambasadora Doboj Istoka i čestitati našoj predsjednici Nevzeti Omerhodžić, jer su svaku moguću priliku, pa i pandemiju iskoristile da najbolji mogući način prezentuju i našu tradiciju i običaje u najljepšem svjetlu Doboj Istoka. Još jednom čestitam.“

Kemal Bratić, općinski načelnik: „Lijepo je čuti kada žena ženu hvali, jer kod njih inače postoji, neću reći netrpeljivost, nego su specifične po tom pitanju. I ja se isto pridružujem željama i čestitam svim udruženjima i stalno govorim i govorit ću da svako ko vodi udruženje građana 7 dana kapa dole, bar što se mene tiče, jer znam kako je to. Kada se radi generalno o udruženjima građana mislim da općina Doboj Istok može biti poprilično zadovoljna sa aktivnostima. Neću izdvajati nikoga posebno penzioneri, udruženja od posebnog značaja, ali i sportski klubovi koji danas ne podnose izvještaj, kao i kulturno umjetnička društva koja su već dugo na budžetu. Nisam najbolje razumio diskusiju kolegice Emire, ličilo mi na izvještaj o odlasku na ekskurziju. Nisam bio u toku ni o Proaktivni kakvi su pokloni, jer koliko ja znam to udruženje građana ima volontere koji odvajaju od svojih plata i na taj način daju nagrade. Ja iskreno ne znam ni šta su bile nagrade, niti je li neko bio zadovoljan ili nezadovoljan. Smatram da je tako uvažena općina Doboj Istok i mislim da su to do sada uradili samo na 3 ili 4 općine na Kantonu kada se radi o ovom projektu, po mojim saznanjima. Kada se radi u ovom prostoru mi radimo na tome i nije tačno da se samo govorio o tom prostoru koji nam je prijeko potreban na području općine kako bi održavali kulturne manifestacije. Nažalost sve ću vas pozvati da se vratimo, jer mi smo zatekli to stanje u svim našim domovima kulture i čitaonicama koje su otišle u nekom drugom pravcu i nisu koristile svrsi za koju su napravljene. Hoću da vas izvijestim da je urađen projekat za kulturni centar ili bosanski kulturni centar ili nekako drugačije ako ga budemo nazvali i proračunska vrijednost je 60 – 70.000 KM. Radi se o multimedijalnoj sali i mi ćemo, ako Bog da, u ovoj godini uraditi jedan dio tih radova koji su potrebni da bi se BKC stavio u funkciju. Ne možemo osnovati BKC ako nemamo makar neki prostor. Znači to će biti javna ustanova koja će funkcionisati na području općine Doboj Istok u čijem sklopu će biti niz aktivnosti ne samo ta sala koja će se koristiti za određene manifestacije na području općine Doboj Istok. To je ono što nam zbilja treba slažem se, ali se ne slažem da se samo o tome priča. To je bio jedan dugotrajan proces, jer to je Mjesna zajednica izdavala i uzimala kiriju, pa smo se dogovorili da to više ne rade. Nadam se da to neće biti zadnji projekat koji će biti na području općine Doboj Istok kada se radi o kulturnim centrima na području naše općine. Bilo bi dobro u narednom periodu ako budemo imali mogućnosti i snage da u svakoj mjesnoj zajednici napravimo jednu takvu salu, kao što idemo u pravcu da imamo u svakoj mjesnoj zajednici po jednu sportsku salu što se pokazuje da je dobar potez. Imao sam potrebu još jednom svim predsjednicima ovdje prisutnim, pa i onim koji nisu prisutni da čestitam na dobrom vođenju udruženja i stojim na raspolaganju i ubuduće za jednu dobru saradnju, ako ništa i bolju kao što je do sada bila.“

Kemal Skopljak, vijećnik: BPS Sefer Halilović: „Naravno da nisam odustao od komentara vezano za izvještaje ovih naših vrijednih ljudi koji nose ove aktivnosti i što poboljšavaju komplet sliku u pozitivnom smislu Doboj Istoka. Prije svega želim da vam se svima zahvalim i pohvalim ovaj vaš rad, jer bez vas naravno ne bi bilo sve ovako kao što jeste trenutno. Međutim moram ovdje da izdvojim Udruženje žena, jer su one stvarno doprinijele pozitivnom izjašnjavanju građana Doboj Istoka što se tiče kulturnih dešavanja. Znači učestvovala su u svemu i to mi vidimo, a ja pogotovo ovdje želim da podvučem njihovu organizaciju vezano za mamografiju da se radi skrining u Tuzli, odnosno za organizaciju žena vezano za skrining mamografije u Tuzli. To je jedna jako bitna stvar koja je veoma bitna za sve žene u općini Doboj Istok. Znači u svakom slučaju još jedanput pohvala svima, a ovo sam morao iznijeti.“

Senada Džanić, predsjednica kluba vijećnika SBB i BPS Sefer Halilović: „Ja se stvarno nadam da će biti pomaka kao što su prethodni govornici rekli vezano za sam BKC, ali bih zamolila da razmišljamo i o pravcu ove naše medijske blokade. Puno toga mi imamo lijepog prezentovati i reći i mislim da bi radio Doboj Istok i vraćanje radija našim građanima i svima nama dobro došlo, pa da imamo u vidu u tim nekim narednim aktivnostima.“

Rifet Mrkanović, predsjednik Udruženja penzionera Doboj Istok: „Gospodine predsjedavajući Općinskog vijeća, gospodine načelnice, gospodo vijećnici sve vas lijepo pozdravljam i selamim. Osjećam potrebu da se zahvalim za saradnju sa svima vama i da vam kažem Udruženje penzionera je stvarno zadovoljno sa saradnjom. Želimo saradnju poboljšati i da vam kažem, pored ovih problema sa koronom koja je pogodila najviše Udruženje penzionera, u stvari penzionere, mi smo završni račun završili sa pozitivnim rezultatom, uradili smo izborne aktivnosti, donijeli smo program koji je više od 50% socijalan, ali tu je i kulturno zabavni program i sportski program. Zahvaljujem vam još jednom na saradnji i želim da se ta saradnja i ubuduće ostvaruje. Hvala vam.“

Nevezeta Omerhodžić, predsjednica Udruženja žena Doboj Istok: „Koristim priliku da vas selamim i pozdravim. Šta reći na ovo kada ste nas tako lijepo pohvalili? Što se tiče našeg udruženja iako je ova korona dosta učinila ipak smo nastojali na neki način da ne bude mrtvo slovo. Imali smo aktivnosti i dobro nam je došla ova preko općine za međuentitetske linije. Znači Općina Doboj i Općina Doboj Istok gdje su bile edukacije i mamografija se radila, a i poziv od Doma zdravlja koji je rađen po porodičnoj medicini gdje su obavještavane žene. Na svu sreću, hvala Bogu, da su ovim pregledom možda jedna ili dvije, ali nije ništa zastrašujuće, kako se dešavalo na nivou Kantona da smo nekada bili među prvima. Ipak su se osvijestile i dobro je došlo tako da im je sada ušlo to u krv da se vrši redovna kontrola. Sada imamo poziv, jer su dosta zapaženi rezultati na Lukavačkom sajmu 5. maja, tu smo prošle godine osvojile 3. mjesto i ove godine, ako Bog da, mi smo aplicirali. Hvala vam na vašem povjerenju, jer to nam je vjetar u leđa da još više radimo.“

Selmin Karić, predsjedavajući Općinskog vijeća: „Ima li još prijavljenih? Nema. Zaključujem tačku i dajem na izjašnjavanje. Ko je za usvajanje Izvještaja udruženja građana o utrošku dodijeljenih budžetskih sredstava za 2021. godinu sa završnim računom?“

Glasanje: ZA – 16, PROTIV – 0, UZDRŽANIH – 0

14. Razmatranje i usvajanje Informacije o provedenim aktivnostima povodom obilježavanja Dana nezavisnosti BiH i Dana općine Doboj Istok.

Selmin Karić, predsjedavajući Općinskog vijeća: „Tačku dajem na diskusiju.“

Emira Karić, predsjednica kluba vijećnika SDP: „Dobro, bila je pandemija obilježavali smo kako smo obilježavali na određeni način i na određene protokole, ali eto nije ovo upozorenje, ovo je, da tako kažem, želja da obilježavanje naknadno da li Dan brigade ili 25. novembar ono što je po kalendaru ipak izdignemo ponovo na malo veći nivo. Naravno, da sarađujemo svi i da zajedno i kulturne i sportske manifestacije odradimo na najbolji način.“

Selmin Karić, predsjedavajući Općinskog vijeća: „Zaključujem ovu tačku dnevnog reda i dajem na izjašnjavanje. Ko je za usvajanje Informacije?“

Glasanje: ZA – 16, PROTIV – 0, UZDRŽANIH – 0

Zahvaljujem vam se. Iscrpili smo dnevni red i zaključujem današnju sjednicu. Želim da vas izvijestim, vjerovatno ste svi upoznati, ali neki možda i nisu da podnosim ostavku na mjesto vijećnika Općinskog vijeća Doboj Istok s obzirom da sam imenovan na jednu funkciju. Želim da vam se zahvalim na dosadašnjem radu i nadam se da nisam nikoga uvrijedio svo ovo vrijeme. Ako jesam nemojte mi zamjeriti, halalite mi. Hvala vam još jedanput i nadam se da ćemo sarađivati i u narednom periodu.“

Sjednica je završena u 12,00 sati.

ZAPISNIČAR
Behara Hadžić

SEKRETAR OPĆINE
Omer Hadžić

PREDSJEDAVAJUĆI OPĆINSKOG VIJEĆA
Selmin Karić

Zapisnik je usvojen na 16. redovnoj sjednici Općinskog vijeća Doboj Istok održanoj dana 28.04.2022. godine.

U Klokotnici, dana 28.04.2022. godine

*Zabilješku sačinio
Omer Hadžić, sekretar Općine*